

I Sulat Febe Pol di ku

Titus

1 ¹Do, Pol, gumdà i sulat ani, satu di dad fasak i Dwata, na dek Dyisas Krayst.

Ta nalékan agu, na dekan agu fambagal i kaftoo dad to ta nalék i Dwata, na mebe dale di kaglut i tdò ta fantooto. ²Na déé gumdà kafden i nawa landè sen ta fala fakang Dwata di laman là fa mimò i balù détan, du i Dwata, là ti tmulenán kéng. ³Na kanto kel i bang ta nalék Dwata, fgadèan ayé di Tnalüan. Na saligan di do tmulen dun di dad to, du yé mdek do i Dwata Falwà gito.

⁴Na smulat agu di ge, Titus, i ngàgu di kaftoo di ku Dyisas Krayst.

Mulà moon i Màta Dwata na Krayst Dyisas i ta Falwà gite, mlé ge kafye na ktanak nawa.

I nimò Titus di Krit

⁵Ta tnagakta ge di Krit du fye fanngem i dad nimò là fa fngen, na malék ge dad ulu di dad simbahani di kat banwe. Toom fandam i flaugu ge ani: ⁶I ulu di simbahani, là fakay ku nun gumaslenan, na yé fye lo satu yaanan, na ftoo i dad ngàan, na ku gdal ale, na là magéng ulula. ⁷Là fakay ku nun gumaslen i ulu di simbahani du ta salig di kenen i dad nimò i Dwata. Na là fakayan fagdag, na mlal falbut, na flangal, na sfati, na lom. ⁸Bay yé fye, lehew kenen dmawat i dad to tlang, na bong nawan i fye, na nun ldaman, na tluh i nimòan, na mtiu i fandaman, na gaganan damnan i kton. ⁹Na yé lê fye, too mbagal i kaftoon di tnalù too gsalig, salngad i ta tdò di kenen, du fye gaganan fanngewe i dad to fagu di glut tdò, na fiten moon di dad to mnang nawa dun i gugsalàla.

¹⁰Du nun dee dad to déé di gamu na balù i dad to ta mgebe mdà di kaftoo dad Dyu, là mimen ale, na fasyatla i dademe dad to fagu di katdòla i là glut. ¹¹Na là fakay ku là nngakam ale du gamsamuk ale di kdee dad to di dademe familya fagu di katdòla i là fakay tdò. Na yé duenla tamdò gambet ayé du fye gamwè ale filak. ¹²Nun satu to mdà di Krit, satu tugadla,

ani manan, "I dad to mdà di Krit, tmulen ale kéng, na salngad ale di labè lmanaf, na too ale malweh, bay tyan ale." ¹³Too glut i manan ayé. Yé duenam man, toom ale nngak du fye glalòla i glut kaftoo, ¹⁴na ta nangla falninge i dad flalok tulen i dad Dyu, na i flau i dad to ta tmagak i kglutan.

¹⁵I to ta mtiu, mtiu kiten kdee. Bay i to là mtiu, na là ftoo, landè mtiu di kenen, du magsik i fandaman na i nawan. ¹⁶Yé manla dilèla kun i Dwata, bay i nimòla fite dun kéng i manla. Too ale sungat, na là mimen ale, na landè fye nimòla.

I glut tdò

2 ¹Bay ge, Titus, toom fasalngad i tdòam di glut tdò. ²Na ani fngewem di dad tua lagi, fgulit ale, tanluhla i dad nimòla fye mgafè ale, na dnanla i ktola, na fakgis ale di kaftoola, na di kakdola, na lè man di kafgalla i nawala. ³Na ani lèam fngewe di dad tua libun, fitela i Idam mgafè. Nangla santulen dademe to, na nang ale fasak di dad gamflangal. Bay lo yé tdòla i fye, ⁴du fye nun gugambet i dad lamnok libun ku dét kibò kakdola i yaanla na i dad ngàla, ⁵na di kadnanla i ktola, na di kaftiu, na di kifatla i familyala, na di kafèla i yaanla, du fye landè samlen i Thnalù Dwata.

⁶Na ani lèam fngewe di dad lamnok lagi, toola dnan i ktola. ⁷Na di kdee kfagu, fitem di dademem i fye gugambet i kdee fye nimò. Na di katdòam, fitem i katluham, na nangam fagu di ulek. ⁸Na toom gnamit i tluh kastulen, du fye i dad to kmuntra ge, landè sasè gmanla gablè di gito, na fagu déé baling ale myà.

⁹Na toom fanngewe i dad fasak fye fdanàla i ktola di dad amula, na flehewla ale di kdee nimòla, na nang ale smumal, ¹⁰na nang ale kalmat. Bay yé fye fitela i kafye balula, na i kagsalig dale, du fye mdà di kdee nimòla ayé, magdayen i tdò gablè di Dwata, dunan i falwà gito.

¹¹Du ta fite Dwata i kafyen fagu di kafalwàan i kdee dad sahal to. ¹²Na fagu di kafye i Dwata, tdòan gito kmagol i kdee knangan, na i sasè nibal i dad to nfun i banwe ani. Na lèan gito tdò damnan i ktoto, na tamluh i nimòto, na mimen di knayèan di knèto dini di tah tanà ani, ¹³di lamto fatan i too mabtas Du fandento, du yé kfite i maltulus Dwata na Dyisas Krayst, i Falwà gito, i kdatahan. ¹⁴Ta blén i kton di fati du fye falwàan ato di kdee sasè, na lnaneban ato, na nimòan ato kenen nfun, na banlén ato kinit nawa mimò fye.

¹⁵Yé tdòam di dad to déé. Na gnamitam i ktoom fminit nawa i dad to flinge di ge. Na ku nun sasè nimòla, nngakam ale. Na nangam faloh ku nun gumadoy i dad to ge.

I Idam i dad to ftoo

3 ¹Fafaldamam di dad to ftoo déé nafèla dad ulu magot i banwela, dunan i dad ganlalla, na nimenla ale, na gatlagad ale mimò i kdee

fye. ²Na nangla santulen sasè di balù simto dun. Bay lo yé fye nebelia i ktnak, na i kafye balu, na fitela i kafè di kdee dad to. ³Du balù gito di munan, là gmadè ato, na là mimen ato, na gsalà i nimòto. Magfasak ato di kdee dad nibalto, na di dad knayèto. Na lo yé gadèto nimò i sasè, na ksafè nawa, na kasnang nawa. ⁴Bay Dwata, i Falwà gito, kanton fite di gito i kafyen na i kalbong nawan di dad to, ⁵ta falwàan ato. Na ise ku yé gumdàto galwà mdà di dad fye nimòto, bay lo mdà di kakdo Dwata fagu di kalob i Mtiu Tulus gito, dunan i mlé gito falami nawa. ⁶Du ta sdule kok Dwata i Mtiu Tulus di gito fagu di ku Dyisas Kryst, i Falwà gito, ⁷du fagu di kafye Dwata nimòn ato tluh di kiten, na gfunto i nawa landè sen i tooto fanden. ⁸Na too ti glut i man-gu ayé.

Yé kayègu ku toom tdò i kalbong kdeen du fye i dad to ftoo di Dwata déé, toola fkah di nawala i kafduf mimò fye. Na i dad tdògu ayé too fye, na nun gukmamu i dad to dun.

⁹Na fawag ge di dad kasdaas landè kamu, na i kbasa kdee dagit i dad muna to, na lê man dad kasbalew na kasgil gablà di dad uldin Dwata fagu di ku Mosis, du i kdee nimò ayé lo gamfalmo, na landè ti gukmamu i dad to dun. ¹⁰Na ku nun to mlak sbalew, na yé gumdàan masgalel fandam i dad to ftoo, nngakamkenen sulê, balù kel di lwe dulê. Na ku là mimenan, tadèamkenen tnagak, ¹¹du gadèam i to gambet ayé, ta malmo i fandaman, na i dad salàan fgadè dun là glut i nimòn.

I gusen i sulat Pol

¹²E Titus, ku dekgu Artimas ku demen Tikiku gadéé di ge, too ge beg fdohò smitong do di Nikopolis du yé ta fnaleh nawagu mnè agu ditù di bangan kel i tno. ¹³Na toom tnabeng Sinas i abugadu na Apulus di kagula, na begam snikof dale i kdee dad kalnidùla. ¹⁴Na toom tdò i dad to ftoo déé fye gnamitla orasla mimò fye du fye gtabengla i dad to nun bong kalnidùla. Là fyen ku tadè ale fanak di landè gukmamu dale.

¹⁵Na i kdee dademegu dini manla “Kumusta ge” kun. Na manam di dad flanekto ftoo déé kumusta di dale.

Mulà moon ku i kafye Dwata mnè di kdeeyu.